

LECTORI



Habe Lector amice! brevem Veteris cumprimis VINDOBONÆ notitiam! brevem ajo: siquidem, ne prolixior sit, illud me CALLIMACHI absterret: *Magnus Liber, magnum malum.* Neque metue, perspicuitati operis aliquid detractum iri brevitate; stylo utor planissimo, sæpe verbis documentorum, sæpius vocibus civitate, utut non Romana donatis; malo quippe intelligi quam laudari. Fiet hac ratione, laborem is saltem ut probet, qui plana & compendiaria methodo certi aliquid de celeberrima urbe nostra scire exoptat. Plures de Augusta hac Cæsarum sede scripsere, quos inter præcipui sunt ENENCKELIUS, HASLBACHIUS, ÆNEAS SYLVIUS, CUSPINIANUS, LAZIUS, ABERMANNUS, LAMBECIUS, KÜCHELBÖKERUS, FUHRMANNUS; verum aut ficcius aliqui,

aut prolixius: omnes instrumentorum, quæ tardius in lucem protracta sunt, penuria, documentis non semper certis usi. Antiquiorem idcirco, ac demonstrari potest, ætatem Urbi huic aliquorum in eam amor tribuit, aliorum novitatis magis ac veritatis studium de ejusdem vetustate detraxit nimium. Optime me quidem iudice de hac agit in Annalibus Principum Austriæ ex stirpe Babenbergica SIGISMUNDUS CALLESIIUS sæculo nostro præmature ereptus. Hunc ego præter Authores synchronos ac documenta authentica ut plurimum secutus sum, adjuncto labore sane operoso coram lustrandi omnia ac inspiciendi, conferendi inter sese, quæque ad rem meam facerent, inde eruendi. Si recte, gaudeo; sin minus, recte me voluisse, gaudebo. Quod si aut plura, aut certiora, ac ego affero, quis mecum communicet, is mihi beneficium frustra hæctenus a pluribus exoratum præstabit. Ceterum omnibus, quæ ex meo aut aliorum sensu attuli, majorem fidem non postulo, quam aut ratio, aut conjectura verosimilis admittit. Vale!

IN-